

Salva Sunrise

Husi Guteriano Neves, Peskizador iha Institute La'ó Hamutuk
Publiku iha *Tempo Semanal*, 15 Oktober 2007

Assuntu Planta LNG hosi Greater Sunrise mosu fali iha debate publiko iha Timor-Leste loron hirak ikus ne'e. Questaun mak sei nafatin. "Pipa atu dada ba nebe?" Hanesan ema hotu hatene katak, Governo Timor-Leste insisti maka'as atu pipa dada mai Timor-Leste ho razaun katak wainhira mai Timor-Leste, sei kria emprego barak ba ema Timor, sei aumenta rendimentu taxa nian, sei atrai investimentu rai liur nian iha seitor seluk no impaktu sekondaria ba ekonomia Timor-Leste nian.

Maibe iha parte seluk, Woodside nebe sai operador iha Greater Sunrise mos seidak muda sira nia pozisaun katak pipa mai Timor-Leste teknikamente susar no financialmente karun liu. Governu *Northern Territory* mos supporta ideia Woodside. Relasiona ho questaun pipa, ne'e katak Timor-Leste tenki negoseia maka'as ho kompania Woodside.

Tuir Sekretariu Estado ba Rekursu Naturais, Sr. Alfredo Pires, Kompania Woodside hato'ona opsaun lima kona ba dezvoltamentu Greater Sunrise. Opsaun ida mai Timor-Leste, opsaun ida ba Darwain no iha opsaun tolu seluk nebe atu hala'o iha Tasi laran, ho modelo nebe differensia. Governu Timor-Leste sei mantein sira nia pozisaun ba opsaun ida atu dada mai Timor-Leste.

Iha parte seluk, hare katak iha tan opsaun ida, nebe mak di'ak ba povo Timor-Leste tuir sociedade sivil nia hanoin. Opsaun ne'e mak husik ka husik lai Sunrise, to'o Timor-Leste preparado ho diak, no se bele, to'o Fronteira Maritimda determinado. Ideia ne'e La'ó Hamutuk rasik submete ona ba Governu anterior, wainhira iha prosesu negosiasaun. (Bele aksesu iha <http://www.laohamutuk.org/Oil/Sunrise/04sunrise.html>) Sekretariadu do Estadu ba Rekursu Naturais, Sr. Alfredo Pires mos hateten atu konsidera ideia ne'e liu hosi media lokal. Baseia ba ideia ne'e, kerek na'in hakarak foti-fali ideia ne'e ho razaun hirak tuir mai ne'e.

Tamba sai Opsaun Husik Sunrise di'ak Liu?

Opsaun ida ne'e baseia ba razaun hirak tuir mai ne'e;
Ida; hare hosi pontu de vista Timor-Leste nia necessidade financialmente, la iha urgensia ba Timor-Leste atu asselerea lalais prosesu dezvoltamentu Greater Sunrise. Agora dadaun no mais e menus tinan 12 tan ba oin, Timor-Leste sei hetan rendimentu hosi Bayu Undan ho valor mais e menus dollares milhaun atus ida kada fulan. Baseia ba prinsipiu nebe sublinha iha Lei Fundu Petroleu, osan hosi Bayu Undan sei bele continua to'o tinan hirak tan depois de mina hotu. Entaun hosi aspektu financial, laiha nesidade urgensia ba Timor-Leste atu aselera dezvoltamentu Greater Sunrise.

Graphika rua tuir mai, hatudu kona ba Rendimentu ba Timor-Leste hosi kampu rua; Bayu Undan (Agora dadaun TL hetan hela osan hosi ne'e) no ida fali hosi Sunrise. Graphika primeiru, hatudu katak se construsaun Sunrise komesa 2009 no ida seluk komesa 2016. Differensia mak, wainhira ita komesa 2009, durasaun rendimentu hosi kampo rua ne'e sei

hotu lalais liu; maibe wainhira ita husik Sunrise ba tempo kleur liu, entaun nia durasaun mos sei kleur liu.

Rua; Prinsipiu *Inter-generation Equity*. Prinsipu ne'e ema hotu konkorda. Problema mak strategia. Lei Fundu Petroleu fo importansia ba prinsipiu ne'e. Maibe Lei Fundu Petroleu ne'e baseia deit ba osan. Hau hanoin di'ak liu se ita tau ne'e iha questaan managementu rekursu naturais geral. Ho prinsipiu ne'e, hau hanoin sei di'ak liu ba Timor atu husik hela Sunrise ba gerasaun futuru atu sira iha liverdade atu decide, kompara ho opsaun atu exploita hotu no tau hela ba sira osan iha Banku.

Tolu; Husik ka salva sunrise hanesan opsaun ida nebe diak atu hein dezenvolvementu teknologia sei di'ak liu tan. Razaun ida nebe halo Kompania mina hili opsaun Darwin nian katak geologicamente, kondisaun route mai Timor nian kle'an liu *doque* ba Darwin. Entaun wainhira ita husik lori hein, ho dezenvolvementu teknologia nebe kompetitivo agora, sei iha teknologia nebe bele resolve questaan ne'e, custu dezenvolvementu sei baratu liu kompara ho agora, no ita bele dezenvolve sistema protesaun ba meio-ambiente nebe idi'ak liu tan.

Hat; ita mos tenki rekonhese katak maski ita iha ambisaun maka'as atu lori pipeline mai Timor-Leste ho esperanca ida maka'as tebes katak projectu ne'e sei kria emprego barak; maibe, hare hosi preparasaun iha parte institusional, rekursu humanus, strutura lei iha rai laran sistema judiciario, no infraestrutura, ita seidak preparadu didi'ak. Entaun, ne'e bele fo impaktu ida katak, ita sei la hetan espektasaun no esperanca nebe maka ita hakarak hosi projectu bot ne'e. Ne'e mos bele fo impaktu ida katak Kompania mina sira viola lei iha rai laran, viola direitu povo nian, estraga meio-ambiente, viola direitu trabalhadores sira no Timor-oan sei la partisipa masimu iha projectu ne'e. Tamba ne'e, husik Sunrise lori prepara didi'ak lai ita nia rekursu humanus, haforca instituisaun, haforca lei hanesan opsaun ida nebe di'ak liu ba ita.

Lima; *Rekursu Humanus no Oportunidade ba Servico*. Hare hosi mehi ida katak pipeline hosi Sunrise sei kria kampu de trabloho barak hanesan questaan ida nebe bele debate. Tuir esperiansia mundu tomak katak seitor ne'e sei la produz kampu de trabalho barak, tamba servico barak mak hala'o ho maquina. Servico barak nebe sei iha mak durante prosesu construsaun; maibe ne'e ba tinan 2-4 deit, ho kwantidade oportunidade servico 2,000-4,000.

Maibe wainhira tama ona fase operasaun, ne'e ema la barak ona. Mais e menus ema na'in 100-200 deit. Ne'e mos precisa ema nebe iha kualifikasaun edukasaun as no iha esperiencia maka'as iha area petroleum no tekniku. Baseia ba realidade rekursu humanu rai laran nebe iha, no ita nia kapasidade atu compete seidak maka'as, opsaun ida ne'e diak atu fo oportuniadade kleur liu tan ba ita lori prepara ita nia rekursu humanu diak liu tan liu hosi treinamentu, bolsu do estudu no seluk tan.

Iha mehi ida mos katak ho projectu ne'e bele lori impaktu sekondaria ba ekonomia local nian. Ne'e liu hosi hotelaria, industira ki'ik sub-contratu ba facilidade sira nebe naton. Ida Ida ne'e, ema hotu konkorda. Maibe questaan maka, preparasaun Timor-oan sira nia halo buat sira ne'e. Tamba ne'e husik Sunrise ba tempo naruk di'ak liu atu Timor-oan sira bele prepara-an didi'ak iha parte hotu, no Governu tenki fasilita no prepara Timor-oan sira.

Nen; Agora dadaun, ita nia demokracia sei fraku hela. Instituisaun do estado seidak forte ho didi'ak no precisa haforca liu tan no ita nia Lei no Regulamentu seidak kompletu no estabilidade politika mos seidak forte. Povo Timor-Leste precisa proteksaun ba sira nia

direitu iha aspektu hotu hosi estadu, liu hosi Lei no Regulamentu. Mos, Kompania mina precisa estabilidade legal no politika molok atu investe. Konsumidor sira mos precisa estabilidade atu assegura sira nia industria. Tamba ne'e, husik lai Sunrise hanesan opsau ida ba Timor-Leste atu demokrasia bele forte, instituisaun do estadu forte no bele hala'o sira nia knar, Lei no Regulamentu nebe atu protégé povo bele iha fatin atu protégé povo no bele fo estabilidade legal no politika ba kompania sira atu investe.

Hitu; Timor-Leste precisa defini fronteira maritima nebe klaro ho Australia, molok komesa desenvolve Greater Sunrise. To'o agora, Timor-Leste ho Australia seidaun defini fronteira maritime. Akordo CMATS la resolve questau fronteira maritime, maibe akordo ne'e rasik sai hanesan akordo komersial ida nebe fo dalan ba kompania sira atu hahu fali exploita riku soi mina ho gas iha Greater Sunrise. Tamba ne'e, se diak liu ba Timor-Leste atu abandon alai kampo ida ne'e. Maski razaun ida ne'e susar oit'oan atu aceita baseia ba realidade nebe iha, maibe se ita husik lai lori defini fronteira maritime, ne'e loke dalan ba ita atu hetan tratadu ida nebe diak liu tan.

Bele ka Lae se Ita husik Sunrise?

Opsau ida ne'e sai susar liu kompara ho situasaun uluk. Razaun tamba Timor-Leste asina tiha ona akordo CMATS iha Janeiro tinan kotuk no Parlemtu ratifika ona ne'e iha Fevereiro tinan ne'e. Maibe, se ita hare ba substansia hosi akordo CMATS rasik, fo hela dalan mai ita, maski dalan ne'e klot.

Baseia ba akordo CMATS, artigu 12.2; hateten katak; *(a) a development plan for the Unit Area has not been approved in accordance with paragraph 1 of [Article 12 of the Sunrise IUA](#) within six years after the date of entry into force of this Treaty; or (b) production of petroleum from the Unit Area has not commenced within ten years after the date of entry into force of this Treaty; either Party may notify the other Party in writing that it wishes to terminate this Treaty, in which case the Treaty shall cease to be in force three calendar months after such notice is given.*

Tradusaun interpretativa hosi artigu ne'e katak, wainhira Plano desenvolvimento la hetan aprovasaun tuir alinea 1, artigu 12 hosi Sunrise IUA iha tinan nen nia laran, depois de loron nebe tratadu ne'e aplikavel ou produsaun petroleum hosi areia ne'e seidaun bele komesa iha tinan sanulu nia laran depois de loron nebe tratadu ne'e aplikavel, parte ida bele notifika ba parte ida seluk katak nia hakarak atu hapara tratadu ne'e. Iha casu ne'e, tratadu ne'e sei la validu tan, fulan tolu depois de data notifikasaun

Artigu ne'e ho interpretaun katak wainhira plano desenvolvimento ba Sunrise la hetan aprovasaun iha tinan nen laran, komesa hosi tratadu ne'e aplikavel ka produsaun la komesa iha tinan 10 nia laran, parte ida hosi Australia ka Timor-Leste bele hapara tratadu ne'e. Entaun artigu ne'e loke odamatan ba parte rua atu bele hapara tratadu CMATS no husik lai Sunrise molok ita preparadu ho didi'ak, no fronteira maritima bele determina.

Ho razaun hirak iha leten, hau hanoin katak sei di'ak liu ba Timor-Leste atu fo preferensia ba opsau ida ne'e, tamba ne'e kontekstual ba Timor-Leste compara ho opsau sira seluk.